

NAQQIUT

Siunnersuut 8. maaji 2015-meersoq taarserpaa

(2014-imut Ilassutitut aningaasaliissutini Nunattalu karsiata naatsorsuutaata siullertut tunniunneqartut akornanni aningaasaliissutit imminnut naapertuutinngitsut nassaarineqarsimaneri tassani peqqutaapput. Taamaammat tabel-ini aningaasaliissutit kisitsisaasa iluarsineqarnissaat pisariaqarsimavoq. Tamatuma saniatigut tabel-it ilaanni allassimanerininik iluarsiiisuteqarnissaq pisariaqarsimavoq. Saqqummiussissummi ataasiakkaanik iluarsiiisuteqarpoq naatsorsuutit iluarsineqarsimaneri tunngavigalugit.)

2014-imut Nunatta Karsiata naatsorsuutaasa akuersissutigineqarnissaannik siunnersuut
(Aningaasaqarnermut Aatsitassanullu Naalakkersuisoq)

Saqqummiussissut

(Aningaasaqarnermut Aatsitassanullu Naalakkersuisoq)

Siullermeerneqarnera

Matumuuna ukiumut aningaasanut inatsiseqarfiusumut 2014-imut Nunatta Karsiata naatsorsuutai Naalakkersuisut sinnerlugit saqqummiutissavakka.

Aallarniutigalugu ajuusaarutigissavara oqaluuserisassap matuma Inatsisartuni oqaluuserineqarnissaata kinguartittariaqarsimanera. 2014-imut Ilassutitut aningaasaliissutini Nunattalu karsiata naatsorsuutaata siullertut tunniunneqartut akornanni aningaasaliissutit imminnut naapertuutinngitsut nassaarineqarsimaneri tassani peqqutaapput. Taamaammat tabel-ini aningaasaliissutit kisitsisaasa iluarsineqarnissaat pisariaqarsimavoq. Tamatuma saniatigut tabel-it ilaanni allassimanerininik iluarsiiisuteqarnissaq pisariaqarsimavoq.

2014-imut naatsorsuutit Namminersorlutik Oqartussat kukkunersiuisartuinit avataaneersunit apeqqusernagit akuerineqarput.

Nunatta Karsia 2014-imi Ingerlatsinermi Sanaartornermilu 222 mio. koruuninik amigartooruteqarpoq, ilassutitut aningaasaliissutit ilanngullugit 127 mio. koruuninik amigartoorussatut missingersuusiortoqarsimagaluartoq, tassa imaappoq allaanerussutit 95 mio. koruuniupput.

IST-mi angusat 154 mio. koruuninik amigartooruteqarfiupput Ilassutitut aningaasaliissutit ilanngullugit 51 mio. koruuninik amigartoorussatut missingersuusiortoqarsimagaluartoq, tassa imaappoq allaanerussutit 103 mio. koruuniupput.

Naalackersuisut ukiup ingerlanerani suliat Inatsisartut Aningaasaqarnermut Akileraartarnermullu Ataatsimiititaliaannut aningaasaliissutinik IST-mut missingersuutitut 98 mio. koruuninik pitsaangitsumik IS-imullu missingersuutitut 148 mio. koruuninik pitsaangitsumik sunniuteqartunik akuersisarsimasunut saqqummiuttarpaat. Suliat tamarmik Aningaasaqarnermut ataatsimiititaliap 2014-imut akuersissutigisimasai ukiumoortumik ilassutitut aningaasaliissutinut inatsimmi ataatsimoortinneqarput.

2014-mi namminersorlutik ingerlatsisut akornanni aningaasarsiorneq ukiunut siuliinut sanilliullugu annikinnerulaarpoq. Raajat akigissaarsimapput aalisarnerulli annikilleriarnerata kinguneralugu akitsuutitigut akileraarutitigullu appariarujussuuartoqarnera.

2014-ip ukiaa tikillugu aningaasaqarnikkut suliarineqartartut tamarmiusut annikilleriarput. Taamaattoq ukiakkut akit qaffasissusiisa allanngorarnerannut tunngasut pingaarnertut aningaasaqarnermut sunniuteqartartut ilaat uuttuutigalugit pitsanngoriarput, tamanna september 2014-imi missingersuutitut malitseqartitsinermi ersissutigineqartunit Nunatta Karsiata angusaasa pitsaanerulernerannut pissutaaqataalluni. Akileraarutinit isertitat qaffarialaarput, Kalaallit Nunaannut nassiussat annertusiartoqqilerput ukiullu siulianut naleqqiullugu suliffissarsiorlutut nalunaarsorneqarsimasut ikinnerulerput.

2013-imiit 2014-imut ingerlatsinermit aningaasartuutit tapiissutillu taamaallaat 0,2 procentinik qaffariarput, 2012-imiit 2013-imut qaffariaat 2,69 procentiusimalluni. Tamanna annertuumik pitsanngoriarneruvoq. Ukioq taanna isertitat 2013-imut naleqqiullugu 1,6 procentinik qaffariarput, tamannalu ajunneqaaq.

2014-imi sanaartorneq 415 mio. koruuninik aningaasartaqarpoq, taakku 2013-imi 773 mio. koruuniusimallutik. Taamaalluni qaqtigoortumik annikitsuinnarnik suliaqartoqartarsimavoq, tamatumunnga ilaatigut pissutaasinnaallutik ukioq 2014-imi sanaartukkat amerlasuut naammassiortorneqarneri 2014-imilu ukiakkut qinersisoqartussanngornera sanaartugassat aallartinneqarnissaannut unikaallaataasumik. Suliakinnerulernerup kinguneraa Sanaartugassanut Iluarsaassanullu Aningaasaateqarfiup ukiup 2014-ip naanerani 1.090 mio. koruuninik imaqarnera.

Ineqarnermut Naalackersuisoq sanaartugassanut iluarsaatassanullu tunngasunut nassuiaasiorpoq, tassani tamakkununnga tunngasuni suliassat sukumiisumik nassuiarneqassallutik.

Ukiuni tulluittuni akileraarutitigut akitsuutitigullu isertitassat nalorninartortaqarput, taakku akit qaffasissusiisa allanngorarnerannut malussarissorujussuummata.

Tupanik Imigassamillu aalakoornartortalimmik tunisaqarnermit akitsuutinit isertitat appariaartorujussuupput tamannalu siunissami peqqissutsimut aningaasartuutissanut tunngatillugu tunngaviatigut pitsaasuvoq. Naalackersuisut ilaatigut tamakku pissutigalugit akitsuusersueriaatsimik naalackersuinikkut ingerlatsinerup erseqqinnerusumik misissuiffigineqarnissaat pisariaqartippaat.

Aalisarnermit isumalluutunik akileraarusersuinnermit isertitat 2014-imi aatsaat taama qaffasitsigaat. Taakku qaffasissuutiinnarneqarnissaanni ilaatigut pisassiissutit akinullu tunngasut apeqqutaapput, ilaatigullu pingaartumik sineriammut qanittumi aalisarnermik pisariillisaaneq aalisakkanillu nutaanik iluatsilluartumik iluaquteqarnissaq, kiisalu aalisarneqareersunik iluaquteqarluarnerunissaq apeqqutaapput.

Agguaqatigiissillugu inuuneqqortusiartornerup kingunerisaanik aningaasartuute-qaleraluttuinnarnissamik naatsorsuuteqarnermi aningaasartuutit isertitallu akornanni ungasinnerusoq eqqarsaatigalugu oqimaaqatigiissitsissutaasinnaasunik aaqqissuussaankkut aaqqissuusseqqittoqartariaqarnera erseqqis-saatigineqarpoq.

Kukkunersuinnermut Ataatsimiititaliaq avataanit kukkunersuuisut kukkunersuuisutut oqaaseqaataannik tigusaqarpoq, Naalakkersuisullu oqaaseqaatini kaammattuutigineqartut oqaaseqaatigineqartullu pillugit ataatsimiititaliamit apeqqutigineqartunut allakkatigut akissuteqassapput.

Naatsorsuutit siullermeerneqarnerisa kingorna Kukkunersuinnermut Ataatsimiititaliap 2014-imut naatsorsuutit kukkunersuuisullu oqaaseqaataat kiisalu Naalakkersuisut tassunga akissutaat suliarissavai. Kukkunersuinnermut Ataatsimiititaliaq suliarinnereeruni kingusinnerusukkut suliarineqartussamik isumaliutissiissuteqassaaq.

Naalakkersuisut Nunap Karsiata 2014-imut naatsorsuutai pillugit Kukkunersuinnermut Ataatsimiititaliamik pitsaasumik oqaloqateqartarnissartik qilanaaraat.

Taamatut oqaaseqarlunga Naalakkersuisut sinnerlugit Nunatta Karsiata 2014-imut naatsorsuutai Inatsisartunut aamma Kukkunersuinnermut Ataatsimiititaliamut suliaassanngortippakka.